

Illunut sanaqataaffiusunut taarsigassarsiat pillugit Inatsisartut inatsisaat pillugu Namminersorlutik Oqartussat nalunaarutaat

Matumuuna nalunaarutigineqarpoq Illunut sanaqataaffiusunut taarsigassarsiat pillugit Inatsisartut inatsisaat nr. 28, 3. decembari 2018-imeersoq, allannguutit ukunani pineqartut ilanngullugit Inatsisartut inatsisaat nr. 27, 21 maaji 2024-meersoq.

Kapitali 1

Atuuffia

§ 1. Inatsisartut inatsisaat manna inigineqartussatut aalajangerneqarsimasunik illunik sanaqataaffigisanik sanaartornermut pissarsinermulluunniit taarsigassarsianut atorineqarpoq.

Imm. 2. Nunaqarfinni illoqarfinnilu tamani, Ilulissat, Aasiaat, Sisimiut, Nuuk aamma Qaqortoq minillugit, Inatsisartut inatsisaat manna naapertorlugu illunik sanaqataaffiusunik sananissamut imaluunniit pisinissamut taarsigassarsitisisoqarsinnaavoq.

Imm. 3. Sumiiffinni nunalerinermut atugassiaasuni illunik sanaqataaffiusunik sanaartornissamut, pissarsinissamulluunniit taarsigassarsitisisoqarsinnaavoq, illu sanaqataaffiusoq ukunannga najugaqarfiussappat:

- 1) nunalerisinnaanermut akuersisummik pigisaqartumit, imaluunniit
- 2) inunnit ingerlatsinermik isumaginnittunit.

§ 2. Illunut sanaqataaffiusunut kommunalbestyrelsi taarsigassarsitisissaaq.

Imm. 2. Kommunalbestyrelsi inunnut nammineersinnaassusilinnut aamma illoqarfimmi imaluunniit nunaqarfimmi illumik sanaqataaffigineqartussami imaluunniit sanaartorfigineqartumi inuit nalunaarsorsimaffianni najugaqartutut nalunaarsorsimasunut taarsigassarsitisinnaavoq.

§ 3. Inuussutissarsiummik ingerlatsiviusumiit imaluunniit ingerlatsiviusussamiit illumik sanaqataanermut taarsigassarsitisisoqarsinnaanngilaq, taamaattoq tak. imm. 2.

Imm. 2. Illumi sanaqataaffigineqartussami inuussutissarsiutit namminersorfiusut mikinerusunik ingerlatsisunut taarsigassarsitisisoqarsinnaavoq.

§ 4. Inatsisartut inatsisaat manna malillugu illunik sanaqataanermut taarsigassarsitisinerup peqatigisaanik inissianut pisortat tapiissutaat atorlugit inatsisit allat malillugit tapiissutisisoqarsinnaanngilaq.

Imm. 2. Illoqarfinni nunaqarfinnilu pisortat attartortitsinermi inissianik atorneqanngitsunik peqarfiusuni imaluunniit illunik sanaqataaffigisanik imaluunniit nammeneq illulianik, inissianut attartortittakkanut innersuussinissamut piumasaqaatinik naammassinnittunik, najugaqarfigineqanngitsunik peqarfiusuni, illunut sanaqataaffiusunut nutaanut sananermut taarsigassarsitsisoqarsinnaanngilaq, taamaattorli tak. § 7.

§ 5. Illup sanaqataaffigisap piffissami sanaartorneqarnerani sanaartornermut pilersaarusionermilu inatsisinik atuuttunik naammassinnittunik sanaartornermut taamaallaat taarsigassarsitsisoqarsinnaavoq.

§ 6. Illunut sanaqataaffigisanut nutaanut pituttuisumik sanaartornissamut isumaqatigiissuteqarfioreersimanngitsunut imaluunniit sanaartornermut aallartinneqareersimanngitsunut taamaallaat taarsigassarsitsisoqarsinnaavoq, taamaattorli tak. § 7.

Kapitali 2

Pissarsinermit aamma illunut sanaqataaffiusunut taarsigassarsineq

§ 7. Kommunalbestyrelsimiit taarsigassarsiarititat illup sanaqataaffiusup nutaap sanaartorneranut atorneqarsinnaapput.

Imm. 2. Kommunalbestyrelsi illumik sanaqataaffiusumik pissarsinermit taarsigassarsitsisinnaavoq aamma naammassillugu sanaartorneqarsimanngitsumik tigusinissamut taarsigassarsitsisinnaalluni.

Imm. 3. Kommunalbestyrelsi taamaallaat illunik sanaqataaffiusunik qanoq ittuunerinik akuerisanik sananermut pissarsinermulluunniit taarsigassarsitsisinnaavoq, tak. § 35. Qanoq ittuunerinik akuerisaasumi sanaartoqataasumit ikiortinnermut aalajangersagaq malillugu taarsigassarsisup ikiortinnissaa, taarsigassarsitsisinissami piumasaqaataavoq.

Imm. 4. Naalakkersuisut qinnuteqaatinut suleriaatsit, piffissamut killiliussat, qinnuteqaatinut immersugassat suliarineqartarneri aammalu assigiissaartunik atuisarnissaq pillugit maleruagassanik aalajangersaasinnaapput.

§ 8. Kommunalbestyrelsi § 7, imm. 1 malillugu illumik nutaamik sanaqateqarnermi ikkussugassat pisanerq naapertorlugu aqqissuunneqarsimasunik sumiiffimmilu ikkussugassatut tunniunneqarsimasunik pissarsinermit aningaasartuutitut uppersararneqarsimasunut taarsigassarsitsisinnaavoq.

Imm. 2. Kommunalbestyrelsi § 7, imm. 2 malillugu illuni sanaqataaffiusuni pioreersuni sulii naammassillugu sanaartorneqanngitsuni sumiiffimmi saniatigut atortussanik pisariaqartunik tunniunneqarsimasunik pissarsinermit aningaasartuutitut uppersararneqarsimasunut taarsigassarsitsisinnaavoq.

Imm. 3. Kommunalbestyrelsi § 7 malillugu sanaartorfigissaanermut, toqqavissap pilersaarusioneranut sanaartorneranullu, sanaartoqataasumit ikiortinnermut aamma ilitersuisumit ikiortinnermut, innaallagissap, erngup imaluunniit kiassarnerup aqutaasa ikkussornerinut kiisalu innaallagissap erngullu aqutaannut, kuuffissuarnullu attavilernissamut pisortat piumasaqarnerinut aningaasartuutitut uppersararneqarsimasunut taarsigassarsitsisinnaavoq.

Imm. 4. Piffissaliussat, illunullu sanaqataaffiusunut taarsigassarsitinneqarnissamik qinnuteqartunut kommunit ikiorsiisarnerat pillugit, Naalakkersuisut paasissutissanik ilassutaasussanik piniartarnek pillugu maleruagassanik aalajangersaasinnaapput.

§ 9. § 7 malillugu kommunalbestyrelsip taarsigassarsiissutigisai, tak. § 8, ukiuni 20-ni amerlaqatigiinnik akilersugassanngorlugit taarsigassarsiissutigineqassapput. Nationalbankip erniaritittagai 3%-pointimik ilallugit taarsigassarsiissutit ernialersorneqassapput. Illup sanaqataaffiusup atulernissaanut akuersissutip ulluanit erniaq aalajangersarneqassaaq, taarsigassarsiallu ukiut taarsersorneqarfissaanni atuulluni.

Imm. 2. Taarsigassarsiissutit ernialersorneqassapput, qaammatillu tamaasa aalajangersimasumik akiliuteqartarnikkut akilersorneqassallutik, qaammammut qaangiuttumut qaammatit aallartinnerini ullormi siullermi, taamaattoq tak. imm. 3.

Imm. 3. Taarsigassarsianut siullermeertumik akiliutigineqartussaq, illumut sanaqataaffiusumut atuilernissamik akuersissutip tunniunneranit ukiumi tulluuttumi februaarip aallaqqaataani siullermeertumik akilerneqassaaq.

§ 10. Taarsigassarsisup, taassumalu inoqutaasa piffissami pineqartumi isertitaat tamarmiusut ukiut tamaasa januaarip aallaqqaataani naatsorsorneqartut tunngavigalugit, qaammatini tulluuttuni aqqaneq-marluusuni qaammammut akiliutigineqartartussaq, tak. § 9, imm. 2, naatsorsorneqassaaq. Siullermeertumik illumut sanaqataaffiusumut atuilernissamik akuersissutip tunniunneranit ukiumi tulluuttumi januaarip aallaqqaataani.

Imm. 2. Taarsigassarsisup, taassumalu inoqutaasa piffissami pineqartumi isertitai tamarmiusut 300.000 koruunit sinnersimatillugit, taamaattoq tak. imm. 1, isertitaasa 35 %-iisa nalinganik ukiumut tamarmiusumik akiliutissat ilaannik taarsigassarsisoq akiliuteqassaaq, taamaattoq annerpaamik ukiumut tamarmiusumik akiliutissaq. Ukiumut tamarmiusumik akiliutissaq taarsigassarsisumit akilerneqanngitsoq nalikillilerneqassaaq.

§ 10 a. Kommunalbestyrelsimit taarsigassarsiat § 7 malillugu aningaasartuutit uppersarsarneqartut tamarmiusut 100 procentii tikillugit annertussuseqarsinnaapput, tak. § 8, nammineq akiliutit ilanngaatigalugit, tak. imm. 2.

Imm. 2. § 7 malillugu taarsigassarsitinneqarnissamik siumut neriorsuuteqarnissami, tak. § 8, qinnuteqartup 25.000 koruuninik nammineerluni akiliutissaminik kommunalbestyrelsimut akiliuteqarnissaa piumasaqaataavoq. Taarsigassarsitinneqarnissamik siumut neriorsuummik qinnuteqartup akuersinera ilutigalugu, nammineq akiliutissat kommunalbestyrelsimut akiliutigineqassapput.

§ 10 b. Inatsisartut inatsisaat manna naapertorlugu illunut sanaqataaffiusunut taarsigassarsiarititanut akilersuutit akilerneqarsimasut, illunik sanaqataaffiusunik pilersaarutaasumik aserfallatsaaliuinissamut, nutarternissamullu kommunip taarsigassarsiissutissatut imaluunniit tapiissutissatut agguagassaanut nuunneqassapput.

§ 10 c. Illut sanaqataaffiusut aningaasalersorneqarnissaat pillugu Inatsisartut inatsisaat manna imaluunniit siusinnerusukkut inatsit naapertorlugu illut sanaqataaffiusut taarsigassarsiffigineqarsimallutik taarsersugassartai sulii taarsersorneqartut pilersaarutaasumik aserfallatsaaliornissaannut, nutarternissaannullu kommunalbestyrelsi taarsigassarsisitsisinnaavoq imaluunniit tapiissuteqarsinnaavoq.

Imm. 2. Taarsigassarsisitsinissamik siumut neriorsuisoqartinnagu pituttuisumik sanaartornissamut isumaqatigiissuteqarfioreersimangitsunut imaluunniit sanaartornernut aallartinneqareersimangitsunut sulianut, tunniussanullu taamaallaat taarsigassarsisitsisoqarsinnaavoq imaluunniit tapiissuteqartoqarsinnaavoq.

Imm. 3. Kommunalbestyrelsi imm. 1 malillugu taarsigassarsisitsisimatilluni, inissianik aserfallatsaaliuinissamut nutarterinissamullu pisortat ikiorsiissuteqartarnerat, tapiissuteqartarnerat imaluunniit aningaasalersuisarnerat pillugit inatsit alla malillugu ilutigisaanik taarsigassarsisitsinnaangilaq imaluunniit tapiissuteqarsinnaangilaq.

Imm. 4. Suliat suliarineqarsimaneranut imaluunniit tunniussassat tunniunneqarsimaneranut uppersaammik takutitsinikkut taarsigassarsiat imaluunniit tapiissutit sulisartumut pineqartumut akilerneqassapput.

Imm. 5. Illunik sanaqataaffiusunik pilersaarutaasumik aserfallatsaaliuinissamut, nutarterinissamullu kommunalbestyrelsip taarsigassarsisitsinissaanut imaluunniit tapiissuteqarnissaanut Naalakkersuisut malittarisassanik aalajangersaasinnaapput

§ 10 d. Taarsigassarsitinneqartup, taassumalu inoqutaasa piffissami tapiissutit aningaasaliiffigineqarnerini piffissami pineqartumi isertitai tamarmiusut 300.000 koruunit sinnersimangippagit aatsaat tapiissuteqartoqarsinnaavoq.

§ 10 e. 100.000 koruunit tikillugit taarsigassarsisitsisoqarsinnaavoq. Taarsigassarsiaritinneqartut tamakkerlugit akilerneqarsimatillugit, taarsigassarsitinneqarnissamik qinnuteqaqqittoqarsinnaavoq. Taarsigassarsiat ukiuni 15-ini akilersugassanngorlugit amerlaqatigiinnik akilersugassaallutik taarsigassarsiissutigineqassapput. Nationalbankip erniaritittagai 3%-pointimik ilallugit taarsigassarsiissutit ernialersorneqassapput. Taarsigassarsiat ullormi tunniunneqarfisa ulluanit erniaq aalajangersarneqassaaq.

§ 11. § 7 malillugu kommunalbestyrelsimit taarsigassarsiat, tak. § 8, § 7 malillugu taarsigassarsiatigut aningaasalersorneqaratik taarsigassarsiffiusinnaallutik aningaasartuutit tamarmiusut taarsigassarsisup nammineerluni aningaasalersorpagit, tak. § 8, aningaasalersorsimaneranullu uppersaammik takutitsineratigut aatsaat taarsigassarsiissutigisinnaapput.

Imm. 2. § 7 malillugu kommunalbestyrelsip taarsigassarsisitsinissamut siumut neriorsuutaanut, tak. § 8, piumasaqaataasinnaavoq, § 7 malillugu taarsigassarsiatigut aningaasalersorneqaratik taarsigassarsiffiusinnaallutik aningaasartuutit tamarmiusut aningaasalersorneqarnissaannut taarsigassarsisup kommunalbestyrelsimut aningaaserivimmi qularnaveeqqusiinissaa, tak. § 8.

§ 12. § 7 malillugu taarsigassarsiatigut aningaasalersorneqaratik taarsigassarsiffiusinnaallutik aningaasartuutit tamarmiusut aningaasalersorneqarnissaannut taarsigassarsisup taarsigassarsiarisinnaasai, tak. § 8, illu sanaqataaffiusoq qularnaveeqqusiullugu qulakkeerneqarsinnaapput.

Imm. 2. Kommunalbestyrelsimit taarsigassarsiat illumi sanaqataaffiusumi qularnaveeqqusiisoqarneratigut isumannaarneqassapput.

Imm. 3. § 7 malillugu taarsigassarsiatigut aningaasalersorneqaratik taarsigassarsiffusinnaallutik aningaasartuutunut tamarmiusunut taarsigassarsisup aningaasalersuinissaanut, illu sanaqataaffusooq qularnaveeqqusiullugu taarsigassarsiissutigineqarsimasut, kommunalbestyrelsimit taarsigassarsiat ataqqissavaat, tak. § 8.

Imm. 4. Kommunalbestyrelsip taarsigassarsiarititai illumi sanaqataaffusumi qaffatsinneqarlutik qularnaveeqqutaassapput.

§ 13. Ukiuni akileraarfusuni inaarutaasumik akileraarusiiffusuni kingullerni tallimani inuussutissarsiuteqarlutik ingerlataqarsimanngitsunut inunnut kommunalbestyrelsi taarsigassarsisitsisinnaangilaq.

Imm. 2. Imm. 1-imi killiliussat apeqqutaatinnagit kommunalbestyrelsi ilinniartunut, ilinniakkaminnik naammassinnissimasunut, aammalu ilinniarnertik peqqutigalugu ukiuni akileraarfusuni kingullerni tallimani sulisimanngitsunut taarsigassarsititsisinnaavoq.

§ 14. Inunnut illumik pigisaqareersunut imaluunniit inigisassatut aalajangersarneqartunut illumi pigineqataasunut aamma Namminersorlutik Oqartussat imaluunniit kommunalbestyrelsip taarsigassarsisitsiffigisimasaanut, sulit tamakkerlugit akiliisimanngitsunut kommunalbestyrelsi taarsigassarsisitsisinnaangilaq.

Kapitali 3

Oqartussaaffissamik killiliineq, atuineq il.il.

Piginnittussaataitaneq atulerneralu

§ 15. Taarsigassarsisup § 7 malillugu ullormi taarsigassarsinissamut neriorsuummik tunineqarnerminiit ukiut marluk qaangiutsinnagit illu sanaqataaffusooq naammassisimanngippagu atulersimanngippagulu siuumoortumik ilisimatitsinertaqanngitsumik taarsigassarsinissamut neriorsuut atorunnaarsinneqassaaq.

Imm. 2. Imm. 1-imi allanneqartumit piffissamik killiliinermit immikkut pisoqartillugu kommunalbestyrelsi immikkut akuersisinnaavoq.

Imm. 3. Illumi sanaqataaffusumi naammassillugu sanaartorneqarsimasumi qularnaveeqquteqartumik kommunalbestyrelsimut inaarutaasumik qularnaveeqqusiussaqluni taarsigassarsinermi allagartamik inaarutaasumik taarsigassarsisup peqalernissaata tungaanut tamannalu naqqiutitaqanngitsumik Kalaallit Nunaanni Eqqartuussivimmi nalunaarsorneqarpat kommunalbestyrelsi atortunut tunniunneqartartunut tamanut kiisalu illumut sanaqataaffusumut sanaartorneqartumut kommunalbestyrelsi piginnittussaataitavoq, tassunga ilanngullugit nalilinnut aamma taarsigassarsisup sulinermini imaluunniit illumi sanaqataaffigisamini aningaasaliisimanerani pilersinneqarsimasuni.

Imm. 4. Illumut sanaqataaffusumut piginnittussaataitaneq taarsigassarsitinneqartumut tunniunneqarsinnaangippat, taarsigassarsisup nammineeqluni akiliutigisai 25.000 koruuniusut, illumillu sanaqataaffusumik sanaartornermi imaluunniit tigusinermi taarsigassarsiffusinnaallutik aningaasartuutini tamarmiusuni taarsigassarsisup aningaasartuutigisimasai, § 7 malillugu taarsigassarsiatigut aningaasalersorneqanngitsut, kommunalbestyrelsip utertissavai, tak. § 8

Najugaqartussaaitaaneq attartortitsinerlu

§ 16. Illumik sanaqataaffiusumik, Inatsisartut inatsisaat manna naapertorlugu taarsigassarsititsiviusumik piginnittoq illumi sanaqataaffiusumi najugaqarnissamut pisussaaffeqarpoq aamma illumi sanaqataaffiusumi inuit nalunaarsorsimaffianni najugaqartutut nalunaarsorsimassallutik, taamaattorli tak. §§ 17-18.

Imm. 2. Illu sanaqataaffiusoq illumi piginnittumit imaluunniit inummit piginnittup inoqutaanut ilaasumit ukiumut minnerpaamik ulluni 180-ini najugaqarfigineqarpat, najugaqartussaaitaaneq naammassineqarsimassaaq.

§ 17. Illumik sanaqataaffiusumik, Inatsisartut inatsisaat manna naapertorlugu taarsigassarsititsiviusumik piginnittup, piginnittup taassumaluunniit inoqutaasa utaqqiisaasumik peqannginnerani, najugaqarfiginngikkallarsinnaavaa imaluunniit inunnut nammineersinnaasunut illu sanaqataaffiusoq attartortissinnaavaa. Qaammatinik pingasunik sivikinnerusumik imaluunniit qaammatinik aqqaneq marlunnik sivilisunerusumik attartortitsisoqarsinnaanngilaq, taamaattoq tak. imm. 2.

Imm. 2. Imm. 1-imi piffissami killiliineq apeqqutaatinnagu, piginnittup illu sanaqataaffiusoq piffissami sivilisunerusumi najugaqarfiginngikkallarsinnaavaa imaluunniit attartortissinnaavaa, piginnittup inoqutaasaluunniit peqannginnerat utaqqiisaasumik pippat ukuninngalu peqquteqarpat:

- 1) napparsimaneq,
- 2) ilinniarneq,
- 3) inissiisarfiimmuut inissinneqarneq,
- 4) innuttaasuni suliaassanik isumagisaqarneq, imaluunniit
- 5) piginnittup nammineerluni imaluunniit piginnittup inoqutaasa ilaata nuutsinneqarallarnera-nik.

Imm. 3. Attartortitsinermik isumaqatigiissut tassanilu piumasaqaatit attartortup attartukkamik tigusinissaa sioqqullugu kommunalbestyrelsemik akuerineqarsimassaaq, tak. § 18.

Imm. 4. Illumik sanaqataaffiusumik piginnittoq kommunalbestyrelsemut nalunaaruteqassaaq piffissami qaqugukkut illu sanaqataaffiusoq najugaqarfigineqanngikkallarnissaanik, tak. imm. 2.

§ 18. § 17 naapertorlugu attartortitsinermi attartortitsinermut isumaqatigiissut Naalakkersuisunit akuerisaq atorineqassaaq.

Imm. 2. Ineqarnermut akiliutit piumasaqaatillu pisortat inissiaataannik attartortittakkanik attartortitsisarnermut maleruagassat sukkulluunniit atuuttut naapertorlugit aalajangersarneqartassapput.

Imm. 3. Attartorneq pillugu isumaqatigiissummi pequtit ilaappata akiliineq aningaasanut qaffasinnerusunut aalajangersarneqarsinnaavoq, taamaattorli annerpaamik ineqarnermut akiliummut naapertuuttoq 10 %-inik ilallugu.

Imm. 4. Attartortitsineq pillugu isumaqatigiissummi piumasarineqassanngilaq attartortup piginnittumik allanik isumaqatigiissuteqarnissaa. Taamatut ittunik isumaqatigiissutit atuuttuunngillat. Attartorneq pillugu isumaqatigiissut atuutissaaq, tassungali atasumik piumasaqaateqarnani.

Imm. 5. Illumik sanaqataaffiusumik attartortup attartukkani inummut allamut attartortissinnaanngilaa. Attartortoq attartortitsippat imaluunniit attartorneqartunik atuineq allanut atugassanngortippagu kalerriisoqaaqarnani attartorneq pillugu isumaqatigiissut atorunnaassaaq attartortullu illu

sanaqataaffusoq ingerlaannartumik qimassallugu. Taamaattoqartillugu piginnittup illu sanaqataaffusoq nammineq najugaqarfigilissavaa.

Eqqartuussivikkut malersuineq aamma taarsigassarsianut qularnaveeqqusiineq

§ 19. § 7 malillugu taarsigassarsinerit suulluunniit tamakkerlugit nalikillilernissaasa imaluunniit akilernissaasa tungaannut, illumut sanaqataaffusumut oqartusnaanikkut killiliinerit uku atuutissapput:

- 1) Illumi sanaqataaffusumi eqqartuussivikkut malersuisoqarsinnaanngilaq.
- 2) Illu sanaqataaffusoq taarsigassarsinermit qularnaveeqqutitut atorpeqarsinnaanngilaq, taamaattorli tak. § 12.

Imm. 2. § 12-imut ilaasunut piumasaqaatinut isumannaarinermit qularnaveeqqusiussaqluni taarsigassarsinermit allagartaq tunngavigalugu imm. 1 eqqartuussivikkut malersuinermit atorpeqarsinnaanngilaq.

Imm. 3. Sillimmasiisarfik, illup ikuallattoornissaanut sillimmasiiffusoq, imm. 1 apeqqutaatinagu, sillimmasiinermit akiliutissanut ernialersorneqartunut aningaasartuutinullu allanut qularnaveeqqusiussaminut pisinnaatitaaffeqarpoq. Sillimmasiisarfik aamma ullormit akiliiffissamit ukiumi ataatsimi qularnaveeqqusiiffigisanut allanut siulliulluni illumi sillimmaserneqartunik akiliutissanut qularnaveeqqusiussanut pisinnaatitaaffeqarpoq.

Piginnittut nikinneri

§ 20. § 7 malillugu taarsigassarsiat piginnittut nikinnerini akiligassanngussapput, taamaattorli tak. imm. 2 aamma § 21, imm. 2.

Imm. 2. § 7 malillugu taarsigassarsiat piginnittut nikinnerini akiligassanngussanngillat:

- 1) taarsigassarsisumiit taassuma aappaanut imaluunniit inooqataanut, imaluunniit
- 2) taarsigassarsisup toqunerani taarsigassarsisup kingornussisussaanut.

Imm. 3. Inooqataasutut isigineqarpoq inuk piginnittut nikinneri sioqqutitsiarlugu sivikinnerpaamik ukiumi marlunni taarsigassarsisumit inoqutaalluni inuit nalunaarsorsimaffiani nalunaarsugaasimasog.

§ 21. Taarsigassarsisup illu sanaqataaffusoq tuniniassaguniuk, sumiiffimmi atuagassiami atugaanerpaasumi nunalu tamakkerlugu aviisimi ikinnerpaamik ataatsimi tamanut ammasumik nalunaaruteqarnikkut illu sanaqataaffusoq tuniniassavaa.

Imm. 2. Illup sanaqataaffusup tunineqarneranut atasumik kommunalbestyrelsimut akiitsut sinneri akilernerqassapput imaluunniit taarsigassarsinermit piumasaqaatit allanngortinnagit piginnittumit nutaamit tiguneqassallutik.

§ 22. Taarsigassarsisup kingorna illu sanaqataaffusoq § 21 naapertorlugu tunisinnaanngippagu, kommunalbestyrelsip isumaqatigiissuteqarnikkut akiitsut sinnerinut naapertuuttumik akiliuteqarluni illu sanaqataaffusoq tigusiinnaavaa.

Akiligassanngortitsineq taarsigassarsianillu tigusiineq

§ 23. § 7 malillugu kommunalbestyrelsimit taarsigassarsiat akiligassanngortinneqassapput:

- 1) Taarsigassarsiat erniaat akilersuutillu akilerneqanngippata, illuummilu qularnaveeqqusiussaqluni taarsigassarsinermi allagartaq malillugu ernianik akilersuutinillu akilersuisarneq pillugu malittarisassat naapertorlugit ernianut, akilersuutinullu akiitsut piffissarititaasup qaangiutinnginnerani taarsigassarsisup akilersimanngippagit, tak. lov for Grønland om pant (qularnaveeqqusiineq pillugu Kalaallit Nunaannut inatsit)
- 2) taarsigassarsisoq illumik sanaqataaffiusumik illersorneqarsinnaasumik aserfallatsaaliisimanngippat, paasineqarpallu kommunalbestyrelsip qularnaveeqqusiinikkut isumannaagai ajornerulersinneqartut,
- 3) taarsigassarsisup ikuallattoornissamut illullu ajoqusersinnaaneranut illu sanaqataaffiusoq sillimmasersimanngippagu, tak. § 34,
- 4) taarsigassarsisup illu sanaqataaffiusoq tamakkiisumik ilaannakuusumilluunniit isaterpagu,
- 5) illumi sanaqataaffiusumi inuussutissarsiornermut ininik aaqqissuussisoqarpat imaluunniit illumit sanaqataaffiusumiit inuussutissarsiummik ingerlatsisoqarpat. Inuussutissarsiutilli namminersorfusut mikinerusut ilaatinneqanngillat, tak. § 3. imm. 2,
- 6) taarsigassarsisup najugaqartussaataaneq malinngippagu, tak. § 16,
- 7) taarsigassarsisup illumik sanaqataaffiusumik kommunalbestyrelsip misissuinissaanut itigartitsisimalluni, kommunalbestyrelsip taarsigassarsisumut nammineq kajumissutsimik isumaqatigiissuteqarniarsimamera iluatsissimanngippat,
- 8) taarsigassarsisoq piginnittut nikinneri pillugit kommunalbestyrelsimut nalunaaruteqanngippat aamma pissutsinik utoqqatsissutaasinnaasunik peqanngippat aammalu
- 9) taarsigassarsisoq §§ 17-18-imut akerliusumik illumik sanaqataaffiusumik attartortitsippat.
Imm. 2. Pissutsit aaqqinneqarnissaannut piffissami taarsigassarsisumut kommunalbestyrelsi nalunaaruteqarsinnaavoq.

§ 24. Taarsigassarsiat § 23 naapertorlugu akiligassanngortinneqarpata, illup sanaqataaffiusup tiguneqarnissaa imaluunniit taarsigassarsisup taarsigassarsiat ingerlaannartumik tamaasa akilinngippagit pinngitsaaliinikkut akitsorterussisoqarneratigit tunisisoqarnissaata piumasarinissaa pillugu kommunalbestyrelsi aalajangiisinnaavoq.

Imm. 2. Kommunalbestyrelsip illu sanaqataaffiusoq tiguppagu, kommunalbestyrelsip aamma taarsigassarsisup akornanni aningaasatigit isumannaagassat kommunalbestyrelsimit naatsorsorneqassapput.

Imm. 3. Aningaasatigit isumannaagassat piffissami kommunalbestyrelsimut tunniussivissami illup sanaqataaffiusup tunisinermi akiata nalingatut naatsorsorneqassapput, kommunalbestyrelsip akiitsut sinnerinut piumasaqaataannik ilanngarlugit. Nikingassutaasut taarsigassarsisumut iluaqutaasut tunniunneqassapput. Nikingassutaasut kommunalbestyrelsimut iluaqutaasut 0 kr.-imut appartinneqassapput.

Imm. 4. Illumi sanaqataaffiusumi kommunalbestyrelsip taarsigassarsiarititaannit siulliullugit akilerneqartussanik qularnaveeqqusiussaqluni taarsigassarsianik nalunaarsorsimasoqarpat aammalu qularnaveeqqummik piginnittup kommunip illumik sanaqataaffiusumik tigusinissaanut ilaatillugu qularnaveeqqutit atsiornissaa itigartippagu, kommunalbestyrelsip illu sanaqataaffiusoq tigusinnaanngilaa.

Imm. 5. Kommunalbestyrelsi illumik sanaqataaffiusumik utertitamik, pisortat illumik qularnaveeqquteqarfigisaannik tunisinermi, illup nalinganut tunineqarnissaanik, taamaattorli

minnerpaamik illup teknikkimut aningaasaqarnermullu tunngasortaata nalinganit akikinnerusumik tunisisoqartannginnissaaq qulakkeerissaaq.

Kapitali 4

Allaffissorneq

Akitsuitit

§ 25. Inatsisartut inatsisaat manna malillugu suliamik suliarinninnermi aningaasartuutitut matussutitut kommunalbestyrelsip taarsigassarsisitsinerata 0,5 procentit akiliutit akileqqu-neqarsinnaapput.

Imm. 2. Taarsigassarsinissamut neriorsuineq akuerineqarpat taarsigassarsisup akiliutit kommunalbestyrelsimut akilissavaa.

§ 26. Qularnaveeqqusiussaqaarluni taarsigassarsinnermi allagartap atsiorneqarneranut atatillugu suliamik suliarinninnermut 1.250 kr.-nik akiliummik kommunalbestyrelsi akileeqqusisinnaavoq.

Imm. 2. Qularnaveeqqusiussaqaarluni taarsigassarsinnermi allagartap imminut sinnerluni atsiorneqarnerata isumagineqarnissanut aamma imm. 1 naapertorlugu tamatumunnga akiliummik akileeqqusinissamut aningaaserivik ataaseq arlallilluunniit kommunalbestyrelsimut piginnaatinneqarsinnaapput.

Suliakkiisarneq

§ 27. Kommunalbestyrelsip inissiatileqatigiiffimmut kommunimit imaluunniit Namminersorlutik Oqartussanit pigineqartumut isumaqatigiissuteqarnermigut, ingerlatseqatigiiffik inissianik aqutsisoq Inatsisartut inatsisaat manna malillugu aqutsinissamut piginnaatissinnaavaa. Kommunalbestyrelsip suliakkiineq tamanna ingerlatseqatigiiffimmut pisussaaffittut suliakkiissutigisinnaavaa.

Imm. 2. Inissiatileqatigiiffik imm. 1 naapertorlugu kommunalbestyrelsi sinnerlugu inatsisip matuma allaffissornikkut aquneqarneranut atatillugu aalajangiisinnaavoq, tassungalu ilanngullugu akitsuutitik akiliisitsisarnermik isumaginnissinnaalluni.

Imm. 3. Kommunalbestyrelsi inissiatileqatigiiffimmut ilitersuisinnaatitaavoq nakkutilliisussaallunilu.

Taarsigassarsinissamut qinnuteqarneq

§ 27 a. Illumik sanaqataaffiusumik nutaamik sanaartornissamut imaluunniit pissarsinissamut taarsigassarsitinneqarnissamut kommunalbestyrelsi tamanut ammasumik qinnuteqaqqusissaaq. Tamanut ammasumik qinnuteqaqqusineq marsip aallaqqaataanut piffissalerlugu, ukiumut ataasiartumik januaarimi pisassaaq. Ilassutitut aningaasaliinnermi, qinnuteqarnissamut naammaginartumik piffissaliilluni tamanut ammasumik nutaamik qinnuteqaqqusisoqassaaq.

Imm. 2. Qinnuteqaatit tiguneqartut suliarineqarnerini, tak. imm. 1, akuerisaallutik qinnuteqartut illutaarnissaminnut pisariaqartitsinerpaasut, inissaminnullu periarfissatut tunineqarnissaminnut periarfissaqanngitsut salliunneqassapput.

Imm. 3. Qinnuteqaatit tiguneqarsimasut suliarineqareerlutik aalajangiiffigineqarnerisa kingorna aningaasaliissutitik atunngitsuugaqassappat, tak. imm. 1, kingusinnerusukkut qinnuteqaatit tiguineri

malillugit qinnuteqaatit suliarineqassapput.

Imm. 4. Qinnuteqartut illutaarnissaminut pisariaqartitsinerisa, periarfissatullu inissiamik pilersornissaminut periarfissaasa imm. 2 malillugu nalilersorneqarnissaanni kommunalbestyrelsip suut eqqarsaatigisassatut pingaartissinnaanera, pingaartitassaalu pillugit Naalakkersuisut aalajangersaasinnaapput.

§ 28. Illumik sanaqataaffiusumik sanaartornissamut imaluunniit pissarsinissamut taarsigassarsitinneqarnissamik qinnuteqaat allaganngorlugu kommunalbestyrelsimut nassiunneqassaaq.

Imm. 2. Qinnuteqaammut ilanngunneqarsimassapput:

- 1) illumut sanaqataaffiusumut kissaatigineqartumut nassuiaat,
- 2) nunaminertamik qinnuteqarnerup assilinera,
- 3) nammineq aningaasalersuinerup pissarsiarineqarsinnaaneranut uppersarsaat,
- 4) pilersaarutaasumik piffissakkaartumillu aserfallatsaaliinissamut qinnuteqartup aningaasartuuteqarsinnaaneranut uppersarsaat aammalu
- 5) qinnuteqartup cpr. normua aamma najugaqarneranut allagartaa.

§ 29. Kommunalborgstyrelsi qinnuteqartup akiliisitsiniarnermut oqartussami pisortanut akiitsui, imaluunniit inissianik aqutsisumi qinnuteqartup attartortitsisumut akiitsui pillugit oqaaseqaammik piniarsinnaanissaanut, qinnuteqartoq kommunalborgstyrelsimut akuersisummik tunniussissaaq.

Imm. 2. § 28 naapertorlugu kommunalborgstyrelsi taarsigassarsinissamut qinnuteqaammik tigusinerminni erngerluni qinnuteqartup pisortanut akiitsoqarnera pillugu Akiliisitsiniartarnermi Oqartussaniit aamma pisortat inissianik attartortittagaannik aqutsisumiit oqaaseqaammik pissarsiniassaaq.

Imm. 3. Kommunalborgstyrelsi qinnuteqartumut, pisortanut 25.000 koruunit sinnerlugit akilerneqanngitsunik akiitsoqartumut taarsigassarsitisinissamik neriorsuuteqarsinnaanngilaq.

§ 30. Kommunalborgstyrelsip suliamik suliarinninnermini, allatut isumaqatigiissuteqartoqarsimanngippat, § 29 naapertorlugu qinnuteqartoq suleqatigalugu suliaq isumagissavaa.

Imm. 2. Toqqavissap sanaartorneranut, illu suliarineqanngitsoq, innaallagissamik VVS-imillu ikkussuinerit, ilitersuisumik ikiorteqarneq pillugit neqeroorutiniq kiisalu sanaartorfigissaanermut aamma pisortat piumasaat malillugit innaallagissamut, imermut kuuffinnullu atassusernermut aningaasartuutitut missingiummik kommunalborgstyrelsi pissarsiniassaaq.

Imm. 3. Ikuallattoornissamut illullu ajoqusersinnaaneranut sillimmasiisoqarnissaanut sillimmasiisarfimmiit neqeroorummik kommunalborgstyrelsi pissarsiniassaaq, qinnuteqartoq aamma nammineerluni neqeroorummik piniarnissamik periarfissaqarpoq.

§ 31. Illumi sanaqataaffiusumi sanaartornermi aningaasartuutit taarsigassarsiarineqarsinnaasut tamarmiusut pillugit missingersuummik kiisalu pilersaarutaasumik piffissakkaartumik aserfallatsaaliinissamut pilersaarut tunngavigalugu ingerlatsinermut missingersuummik kommunalborgstyrelsi suliaqassaaq.

§ 32. Missiliummik, ingerlatsinermilu missingersuummik qinnuteqartumit akuersissanngortitanik kommunalborgstyrelsi saqqummiussissaaq. Matuma kingorna nammineq akiliutissat akilerneqarsimanerat,

tak. § 10 a, imm. 2, aningaaserivimmit qularnaveeqqusiussaasinnaasoq, tak. § 11, imm. 2 aamma akiliutaasinnaasut akilerneqarsimanerat, tak. § 25, apeqqutaatillugit taarsigassarsisitsinissamut siumut neriorsuummik kommunalbestyrelsi qinnuteqartumut nalunaaruteqassaaq.

§ 32 a. Ukiumut naatsorsuusiornermi kommunalbestyrelsip paasissutissat ukua ilanngutissavai:

- 1) Ukiumi naatsorsuusiorfiusumi taarsigassarsisitsinissamik siumut neriorsuutit amerlassusaat.
- 2) Taarsigassarsisitsinissamik siumut neriorsuutit atuuttut amerlassusaat.
- 3) Taarsigassarsisitsinissamik siumut neriorsuutit ukiumi naatsorsuusiorfiusumi naammassisimasut amerlassusaat.
- 4) Ukiumi naatsorsuusiorfiusumi aningaasaliissutinik tamarmiusunik atuineq.

Imm. 2. Paasissutissat sumiiffinnut agguataarneqassapput.

Imm. 3. Kommunalbestyrelsip ukiumut naatsorsuutinik saqqummiussinerata kingusinnerpaamik ilutigisaanik paasissutissat Naalakkersuisunut nassiunneqassapput.

Kapitali 5

Taarsigassarsianik tunniussineq

§ 33. Nassiunneqartussatut tunniussineq pillugu uppersaasiinikkut atortunik pilersuisumut kommunalbestyrelsip taarsigassarsisitsinera tunniunneqassaaq.

Imm. 2. Sanaartorfigissaanermut, toqqavissap pilersaarusiorneranut sanaartorneranullu, illumut suliarineqanngitsumut aamma innaallagissamut, imermut, kiassarnermullu ikkussuinnermut kiisalu ilitersuisumit ikiorserneqarnermut taarsigassarsiissutit, suliat suliarineqarsimanerinut uppersaammik takutitsinikkut sulisartumut pineqartumut akilerneqassapput.

Imm. 3. Imm. 1-imit aamma 2-mit allaanerusunik taarsigassarsianik tunniussineq pillugu maleruagassat ilanngullugit taarsigassarsiat tunniunneqarneri pillugit malittarisassanik Naalakkersuisut aalajangersaasinnaapput.

§ 34. Illu sanaqataaffusoq, taarsigassarsisitsiffusoq qaqugukkulluunniit ikuallattoornissamut illullu ajoqusersinnaaneranut sillimaserneqarsimassaaq, aamma sanaartornerata nalaani.

Imm. 2. Ikuallattoornissamut illullu ajoqusersinnaaneranut sillimasiisoqarsimaneranut uppersaateqanngitsunik aamma akiliinissamut kinguaattoorfunngitsunut taarsigassarsianik kommunalbestyrelsi tunniussisinnaanngilaq.

Imm. 3. Sillimasiisarfiup sillimasiissummut akiliutissaq akilerneqarsimanngitsoq pillugu kommunalbestyrelsi nalunaarfigisinnaavaa.

Kapitali 6

Qanoq ittuuneranik akuersineq

§ 35. Ukiumik ataatsimik sivissusilimmik atuuttussamik illup sanaqataaffiusup qanoq ittuuneranik Naalakkersuisut akuersissuteqartassapput. Ilusilersorneqarnissaanut, atornerneqarnissaanut, teknikikkullu atortulersuutitut kiisalu sanaqateqarnissamut Naalakkersuisut piumasaqaasorsinnaapput.

Imm. 2. Illup qanoq ittuuneranik akuersisoqarnissaa pillugu qinnuteqaat illup sanaqataaffiusup ukiuni siullerni 20-ni naafferartumik aserfallatsaaliornissaanut pilersaarummik imaqassaaq. Pilersaarummi ukiuni siullerni 20-ni naafferartumik aserfallatsaaliinissamut pilersaarutigineqartunut ukiumut aningaasartuutit missiliornerinik naatsorsugaqassaaq.

Kapitali 7

Atulernissaanut ikaarsaariarnermilu aalajangersakkat

§ 36. Inatsisartut inatsisaat nr. 28, 3. decembari 2018-imeersaq ulloq 1. januar 2019 atuutilerpoq.

Imm. 2. Peqatigisaanik Inissialiornermut, illunut ataatsimoorussanut, illuliassanut il.il.

tapersiissuteqartarneq pillugu Inatsisartut peqqussutaat nr. 11, 19. november 2007-imeersumi §§ 47-63 atorunnaarsinneqarput.

§ 2

Inatsisartut inatsisaat nr. 27, 21. maaji 2024-imeersaq (Illunut sanaqataaffiusunut kommunimit taarsigassarsiat, illunillu sanaqataaffiusunik il.il. aserfallatsaaliuinissamut, nutarterinissamullu taarsigassarsiat tapiissutillu)^[1] ulloq 1. Juni 2024 atuutilissaaq.

Imm. 2. Inatsisartut inatsisaata matumap atuutilernissaa sioqqullugu illunut sanaqataaffiusunut taarsigassarsiarititat, taarsigassarsisitsinissamillu siumut neriorsuutit piumasaqaataat allanngortinnagit ingerlaqqiinnassapput.

Imm. 3. Inatsisartut inatsisaata atuutilernissaa sioqqullugu malittarisassat atuuttut naapertorlugit qinnuteqartut taarsigassarsitinneqarnissaminnik siumut neriorsorneqarsimasut, kommunalbestyrelsimut qinnuteqarnermikkut inatsisartut inatsisaanni matumani malittarisassat naapertorlugit taarsigassarsitinneqarnissaminnik nutaatut siumut neriorsorneqarsinnaapput.

Imm. 4. Taarsigassarsitinneqarnissamik siumut neriorsuummik nutaamik tunineqarnissamik qinnuteqaat kommunalbestyrelsip itigartissinnaavaa, tak. imm. 3, taarsigassarsitinneqarnissamik siumut neriorsuut tunngavigalugu inatsisitigut pituttorsimasumik aalajangersaasoqarsimappat imaluunniit nutaamik siumut neriorsuuteqarnissamut atatillugu aningaasartuuteqarnerunissamut aningaasaliissutitigut matussutissaqanngippat.

Ineqarnermut Attaveqaasersuutinullu Naalakkersuisoqarfik, ulloq 03. marsi 2025

Ruth Lindhardt (atsior.)

Naalakkersuisoqarfimmi pisortaaneq

/ Embla Kristjánsdóttir (atsior.)

[1] Inatsimmi allannguineq § 1, imm. 3, § 7, imm. 3, § 8, § 9, § 10, § 10a, § 10b, § 10c, § 10d, § 10e, § 11, § 12, § 15, imm. 4, § 23, imm. 1, nr. 1, § 27a, § 28, imm. 1, § 32, § 32a, § 33, imm. 2, § 35, imm. 1.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut